

## A PŌŌL GĀN WŪN SĒB KŪ A NĀANMĪN PUORBO NA BE A FILIPAI

**I** Maa Pōōl nī Timoti na ı a Yesu Kırısto tōtōnbo, le sere koro a Nāanmīn nibe na be a Yesu Kırısto 'yōō be a Filipai, lōon a pupuorbiir nıderbe nı a sōsōnbo.

**II** Wāefo nı nyā'maar na yi a sı Sāa Nāanmīn nı a sı Soro Yesu Kırısto sē, a be a yi sē.

**III** N ma puor a n Nāanmīn yāan, maa wa tıer yi sōō jaa.

**IV** N ma soro na Nāanmīn nı popel koro a yi jaa a n Nāanmīn sorofo pō,

**V** bojūu yi mı pōō man mōol a Nāanmīn 'yerbir totaa a bıbir dōō 'lōnō, tı tān a pōpāanyā.

**VI** A nıtō jūu, n tara na sofo ıka a Nāanmīn nyā na piel a tōvıla a yi pō, na kāan ka a tı baar a Yesu Kırısto waa bıbir.

**VII** A tara na sor ıka n tıer a nıtō a yi jaa jūu, ın tara a yi tıer jūu, ka ba lū man nı bōjorsı bı, baa lū ma ε, n chene na mana a Nāanmīn 'yer ıka a ın yelmāε, yi jaa lōō pōn ma a Nāanmīn wāefo.

**VIII** Nāanmīn le ı a n dāasıe soō a le ın tara a yi tıer fıka a le a Yesu Kırısto na tara a yi tıer.

**IX** Maa Nāanmīn sorofo nı nyā ıka, a yi nō taa wō le pōō 'yōō yōō jaa, nı yē nı par bōōfo.

X Yɪn wa ɪrɛ a lɛ, an sɔ̃sɔ yɪ na ka yɪ bɔ̃ɔ bon 'lɔ na ɪ bɔ̃sɔ̃, ka a Kɪrɪsɪtɔ waa bɪbɪr, ka yɪ ɪ cheche tɪ na yɪ ta tara chefɔ jaa ɛ,

XI na yɪn sɛɛn yeltorsɪ wɔ̃mɔ̃ tu a Yesu Kɪrɪsɪtɔ pɔ, ka nɪbɛ pɛɛrɛ 'yɔ̃ɔnɔ̃ nɪ Nāanɪmɪn yuor tuɪ.

XII N yɛɛr, n bɔ̃ɔrɔ na ɪka yɪ bɔ̃ɔ a par ɪka a lɛ na ɪ a n sɛ̃, sɔ̃sɔ ma naa ka n mɔ̃ɔl a Nāanɪmɪn 'yɛrbɪr.

XIII A lɛ na ɪ jūu, a chaar kɔ a bala na guro a nāa yɪr nɪ nɪrɛ jaa ɪka, ba 'yɔ̃ɔ ma naa a bɔ̃jɔrsɪ a Kɪrɪsɪtɔ jūu.

XIV A maa ban 'yɔ̃ɔ a bɔ̃jɔrsɪ jūu, a yɛɛr yɔ̃ɔ jie na tara sɔ̃ɔfɔ a sɪ Soro 'yɔ̃ɔ chɛnɛ na tara ākpɛ̃ɔ mɔ̃ɔlɔ nɪ a Nāanɪmɪn 'yɛr nɪ nyāa ba joro dābāɛ ɛ.

XV A ɪn yɛlmāɛ ɪka, nɪbɛ bamɪnɛ mɔ̃ɔlɔ na a Yesu Kɪrɪsɪtɔ yɛlɛ ban tara nɪ ma nyuur nɪ nɛchɪrɛ jūu, tɪchɛ bamɪnɛ 'lɔ, mɔ̃ɔlɔ na a Kɪrɪsɪtɔ yɛlɛ na sɔ̃ɔn ma.

XVI Banyāna lɛ mɔ̃ɔlɔ a Kɪrɪsɪtɔ yɛlɛ yɪn nɔ̃fɔ pɔ, na ba bɔ̃ɔ a par ɪka ba pɔɔ ma naa a Nāanɪmɪn 'yɛrbɪr mɔ̃ɔlfɔ jūu.

XVII A bala ɪn de nie 'yɛr a ba 'yɛr na mɔ̃ɔl a 'yɛr nɪ nyuur, maal a lɛ ɪka a n dɔ̃ɔyɛ wɔ lɛ pɔɔ 'yɔ̃ɔ bɛ a pɔ̃ɔfɔ die pɔ.

XVIII Tɪchɛ bo lɛ an ɪ? A lɛ na ɪ nɪbɪjɪɛ lɛ ɪka ba mɔ̃ɔl a Yesu yɛlɛ sɔ̃r jaa pɔ, ka ba sɔ̃ɔn ɪka yɛlmāɛ lɛ bɪ, jɪrɛ lɛ bɪ, a nɪtɔ̃ vɛ̃ naa ka n pɔɔ pɛl. Yɛlmāɛ jaa ɪn chɛnɛ na tara pɔpɛl.

XIX Bojūu n bɔ̃ɔn naa ɪka tu a yɪ Nāanɪmɪn sɔ̃ɔrfɔ nɪ a Yesu Kɪrɪsɪtɔ Sɪɛ sɔ̃ɔfɔ jūu, a lɛ na ɪ a n sɛ̃ ɪn nyɛn faafɔ.

**XX** Bon 'lo na ɪ ma nɪbijɛ nɪ a n tɪɛrtɔ jie lɛ ɪka, vã wɔ ta kpɛ ma sɔr jaa pɔ ɛ, tɪchɛ ka n tara ãkpɛɔ ka a Kɪrɪsɪto na nyɛ tɪɛr a n 'yɔɔ, ka a n nyɛvɔr pɔ lɛ, bu a n kũu pɔ lɛ.

**XXI** Bojũu maa 'lo, maa chɛnɛ nyɛvɔr pɔ, n ben be kɔ a Kɪrɪsɪto, ka maa mɪ kpi, ka a ɪ tɔ̃nɔ̃.

**XXII** Ala ɪ n chɛnɛ na nyɛvɔr pɔ, ɪn tɔ̃n tɔ̃vɪɛl yɔɔ, tɪchɛ n kaa ir buor? N ba bɔɔ a 'lo ɪn na kaa ir ɛ.

**XXIII** A yɛlɪ ayi anyã lũ ma naa, maa bɔfɔ lɛ ɪka n yi a ka tɪ be a Yesu Kɪrɪsɪto sɛ̃. A lɛ lɛ vɪla,

**XXIV** tɪchɛ a chɛnɛ na fer kɔ yɪ, ala ɪ ɪn chɛnɛ na a nyɛvɔr pɔ.

**XXV** ɪn be na bɔ̃ɔn a nɪtɔ̃, n bɔ̃ɔn na yɛlmãɛ jaa ɪka ɪn chɛnɛ na be a yɪ jaa sɛ̃ naa sɔ̃nɔ̃ yɪ ka yɪ sɔɔ Nãanmɪn, na yɪ tara pɔpɛl a yɪn sɔɔ wɔ jũu.

**XXVI** A lɛ ɪn lɛ lɛ be a yɪ sɛ̃ go, ka a yɪ pɔpɛl yɪn tara a Yesu Kɪrɪsɪto 'yɔɔ lɛ pɔɔ 'yɔɔ a maa tɔ̃mɔ̃ jũu.

**XXVII** Yɛle jaa wa ɪ, yɪ nyɔɔ yɪ mãɛ vɪla a lɛ a Kɪrɪsɪto 'yɛr nɔ̃ɔ na wɪle. Ka n wan wa nyɛ yɪ bu, maa ba wa be a yɪ sɛ̃ tɪ wɔ̃ a yɪ yɛle, ɪn bɔ̃ɔn ɪka yɪ ara na kpɛɔ nɪ nɛbɔ̃'yɛn, na yɪ tara tɪɛr bɔ̃'yɛn a sɔɔfɔ nɪ a 'yɛr nɔ̃ɔ pɔ,

**XXVIII** na yɪ ta joro dãbãɛ nɪ a bala na 'yɛr ɪka a ba ɪ lɛ lɛ ɛ. A nyã ɪn jãnɛ kɔ ba ɪka ban din dɔɔyɛ, tɪchɛ ka Nãanmɪn faa yɪ.

**XXIX** 'Lo lɛ kɔ yɪ a kpɛɔ a wɔ wãɛfɔ jũu, a ba ɪ a Yesu yɪn sɔɔ tɛɛ ɛ, tɪchɛ yɪn lɔ̃ɔn wɔ dire a dɔɔyɛ jũu.

**XXX** Ka a dɔɔyɛ nyã yɪn be na dire ɪn a dɔɔyɛ 'lo yɪn nyɛ ɪn di, nɪ a dɔɔyɛ yɪn be na chɛnɛ wɔ̃nɔ̃ ɪn dire.

## II

I Ala ɪ yɪ tara na ākpě̀ɔ, bojũu yɪ ɪn bõ'yen nɪ a Kírɪsɪto, na yɪ tara āgān 'maar a wɔ nõfo pɔ, na yɪ tara nebõ'yen nɪ a Nāan̄mɪn Sɪɛ na yɪ nyɛ vɪla nɪ nɪbaal,

II yɪ pāa vɛn̄ ka a n pɔpɛl sɛɛ, yɪn tara tɪɛr bõ'yen, na yɪ tara nõfo bõ'yen, na yɪ tara Nāan̄mɪn Sɪɛ bõ'yen nɪ tɪɛr bõ'yen.

III Yɪ ta maal yele 'lo na ɪ nyuɛr yele bɪ na yɪ wɪle yɪ mǎɛ ɛ, tɪche yɪ siir yɪ mǎɛ 'yõɔnõ nɪbe gar a yɪ mǎɛ.

IV ɪsɔɔ jaa wɔ ta bɔɔɔ a wɔ pɔpɛl bonsɪ ɛ, tɪche ala nɪ na pele a yɪ taaba pɔɔr.

V Yɪ tara a tɪɛr nyǎ nɪ wɔ ju a Yesu Kírɪsɪto na dõɔ tara.

VI Wɔn sɔɔ jǎtaa nɪ Nāan̄mɪn ka ba ɪ bõ'yen, tɪche waa de a jǎtaa nyǎ mana nɪ Nāan̄mɪn ɛ, wɔ den bar,

VII tɪche na wɔ siir wɔ mǎɛ, na wɔ maal wɔ mǎɛ tõtõnõ, ka ba dõɔ wɔ ka wɔ tara nɪsaal āgān, na wɔ ɪ nɪsaal.

VIII Wɔ siir wɔ mǎɛ nɪsaal kaar tu a Nāan̄mɪn nɛɛ lɛɛɛ tɪ kpɪn a daa ju.

IX A le jũu, Nāan̄mɪn 'mɔɔ wɔn ka wɔ do gar bon jaa, na wɔ kɔ wɔ yuor na gar a yoe a jaa.

X Nāan̄mɪn maal a nɪtõ ka a Yesu yuor jũu, gbɛdumo jaa na gbur naa a saaju nɪ a wɛr pɔ, nɪ a tɛɛ par,

XI ka a jǎlbɛ a jaa 'yer ɪka, Yesu Kírɪsɪto le ɪ a sɪ Soro 'yõɔ a Sǎa Nāan̄mɪn yuor tɪɛr.

XII A le jũu, n yɛɛr, nɪtǎa a le jaa yɪn ma sɔɔ ma, a ba ɪ a sõɔ 'lo ɪn maa wa be a yɪ jie tɛɛ ɛ, tɪche

yɪ sɔɔ ma gar a lɛ un sɔɔ ba be a yɪ sɛ̃ ɛ. Yɪ mɔ̃ɔ nɪbɪr tɔ̃nɔ̃ a yɪ faafɔ tɔ̃mɔ̃ nɪ dābāɛ nɪ mɪrfɔ.

**XIII** Bojūu yɪn tɔ̃ɔ tɔ̃ a lɛ an ɪ Nāaŋmɪn lɛ sɔ̃nɔ̃ yɪ ka yɪ tara ākpɛ̃ɔ na yɪn tɔ̃ a lɛ wɔ̃n bɔ̃ɔɔ.

**XIV** Yɪ ma maal bon jaa tɪ na yɪ ta ma ɪrɛ gborɔ̃ gborɔ̃ bu chɪrɛ taa ɛ.

**XV** Ka yɪ kɔ̃ tara chɛfɔ nɪ yɛlɛ jaa ɛ, na yɪ ɪ Nāaŋmɪn bibiir banyā na ba tara chɛfɔ jaa ɛ, na yɪ kpɪɛrɛ wɛr nyā pɔ̃ tɔ̃dɛbɛ nɪ yɛlbɛ-ɪrɛbɛ na be na yɪ chaar ŋmɛrbɪɛ kaar a wɛr pɔ̃.

**XVI** A lɛ yɪn sɔɔ a nyɛvɔr 'yɛr lɛ na sɔ̃ɔ ma ka a Yesu waa bɪbɪr ka ŋ na tɔ̃ɔ wiil a n māɛ ɪka n ba jo pɔ̃ɔ ɛ, bu a n tɔ̃mɔ̃ ba ɪ pɔ̃ɔ ɛ.

**XVII** Ala sɔɔ ɪ un dɪn dɔ̃ɔyɛ naa pɔ̃ɔ a yɪ dɔ̃ɔyɛ pɔ̃ yɪn dɪrɛ yɪn sɔɔ Nāaŋmɪn jūu, n pɔ̃ɔ pɛl naa nɪ yɪ jaa.

**XVIII** A lɛ jūu, yɪ mɪ pɔ̃ɔ ma ka sɪ chɪlɛ.

**XIX** Ala ɪ a sɪ Soro Yesu wa sɔɔ naa, un tɔ̃n Timoti ka wɔ̃ wa a yɪ sɛ̃ sɔ̃ɔ kɔ̃ɔ ka n wɔ̃ a yɪ yɛlɛ ka a āgān 'maa ma.

**XX** N ba tara nɪrɛ jaa na kaara a wɔ̃ kaar ɛ, ka wɔ̃ na tara a yɪ bɔ̃bɔ̃ɔrsɪ jaa ɛ.

**XXI** Ba jaa bɔ̃ɔɔ naa a ba pɔ̃pɛl bɔ̃bɔ̃ɔrsɪ, na baa bɔ̃ɔɔ ala na pɛlɛ a Yesu Kɪrɪsɪtɔ̃ pɔ̃ɔ ɛ.

**XXII** Tɪchɛ Timoti tɪɛr 'lɔ̃ yɪn bɔ̃ɔn fɪka sāa nɪ wɔ̃ bɪɛ, wɔ̃ pɔ̃ɔ ma naa ka sɪ mɔ̃ɔl a Nāaŋmɪn 'yɛr nɔ̃ɔ.

**XXIII** A lɛ jūu, n bɔ̃ɔɔ na ɪka n tɔ̃ wɔ̃ a yɪ sɛ̃, maa wa nyɛ lɛ yɛlɛ na ɪrɛ kɔ̃ɔ ma.

**XXIV** N sɔɔ naa ɪka a sɪ Soro na yuon sɔ̃r kɔ̃ ma ka maa māɛ wa nyɛ yɪ fɔ̃ɔ jaa.

XXV Bojũu n nyen ka a ı ferfo ko ma ıka n tũ Epafaroditusı na ı a n yebe ni a n tũtũto soo, na wo mi dire a n dooye to soo. Wo mi in a yi tũtũnũ yin tũ ka wo wa maal a n bũbuorsı ko ma.

XXVI Bojũu wo buoro na ıka wo nye yi jaa tiche ka a wo puo sũo yoo jaa, bojũu yi wũn an ooro wo.

XXVII Yelmãe, a ooro won nibijie ka wo che bãlãa naa kpi. Tiche Nãanmin wa kãan a wo nibaal, a ba ı 'lo tee e, tiche wo mi kãan a n nibaal, ka n ta tara puo sũo yoo e.

XXVIII Bojũu maa le mũo nibir ıka n tũ wo a yi sũ, ka a yi puo na pel ala ı yi le nye won go, ka a n ãgãn na 'maa.

XXIX Yi soo de wo ni pupel a si Soro jũu, na yi 'yũonũ a nibe banyã taaba,

XXX bojũu wo din dooye a wo nyevor po, na wo ta ure na kpi a Kiristo tũmũ jũu ıka wo tũ a tũmũ ala yin ba tũo tũ ko ma e.

### III

I N yeer, a baaraa ni nyã ıka yi tara pupel a si Soro 'yũo. A ba ı tuo ko ma in le seere a yelsı ala ni a ju koro yi go e, an in sũofu ko yi.

II Yi bũonũ sũ ni a baar banyãna, ba in yelbe-urbe na ba ma nmara nibe yoi poro.

III Bojũu sin le ı a yonmarba sire jaa, na si puoro a Nãanmin a Si e po, na si tara tur a Yesu Kiristo 'yũo, na saa kaara a ãgãn e.

IV Maa gba tara na mana na tũo man tu a ãgãn po. Ala ı nure mi tara na yelsı amine na man, ka a le na vẽ ka wo tara soofu a ãgãn po, maa tara na gar wo.

V Ba ηmaan a n yoor a ber aniin daar, ka n ι a Isiral nire naa ι a Benjamin bal nire, naa ι Heburu, ka ba dɔɔ ma ka ι Heburu nire. A neε tufɔ jūu, ka ι Farasee.

VI N dɔɔn mɔɔ nɔbir naa gere a pupuorbiir gbulsɪ, a nebināa yeltorsɪ jūu, n ba tara chefo jaa ε.

VII Tiche a ala a jaa un dɔɔ nye tier uka a tara na tɔnɔ, n wa nyen ka a ba tara tɔnɔ jaa kɔ ma ε, a Yesu Kɪrisito jūu.

VIII Bo le gar a nitɔ, n nyen ka bon jaa ba tara tɔnɔ ε, maa de man ala na tara tɔnɔ ala ι n bɔɔ naa a n Soro Yesu Kɪrisito na ι a tier sɔɔ. A wɔ jūu le n bar bonsɪ a jaa. A un sɔsɔɔr kɔ ma, un buɔɔ uka n bɔɔ Kɪrisito,

IX ti naa buɔɔ uka n be a wɔ pɔ, naa ta buɔɔ a maa mae yeltorsɪ ala na yi a nebināa pɔ ε, tiche a yeltorsɪ ala na yi a Kɪrisito sɔfo pɔ. A yeltorsɪ anyā le yi Nāanmɪn sē naa ι sɔfo.

X N buɔɔ na uka n bɔɔ a Kɪrisito nɪ a wɔ kūu pɔ heb irfu kpɛɔ, naa lɔɔn wɔ di a dɔɔye wa kaara a wɔ kaar a wɔ kūu pɔ,

XI ka n mɪ wa pɔɔ a bala mɪ na wa heb ir a kūu pɔ.

XII A ba ι n tara na a anyāna a jaa ε, bu n un cheche ε, tiche n mɔɔn nɔbir uka n nyɔɔ kpɛɔ, ka Yesu Kɪrisito mɪ nyɔɔ ma kpɛɔ.

XIII N yeer, n ba 'yer uka n nyɔɔn yele jaa baar ε. Tiche yele bɔ'yen un ι le uka, n iin a ala na be a puor bar, ti mɔɔ nɔbir tierε a ala na be a niem.

XIV N mɔɔn nɔbir uka n ti de a saaju kɔfo a Nāanmɪn na buɔl ma tu a Yesu Kɪrisito 'yɔɔ.

**XV** A sin bala na baa a Nāanmɪn Sɪe pɔ, sɪ mɪ ma tara a bonɪ a nyāna tɪer. Tɪ yɪn wa tɪer yelyuo ye le jaa pɔ, Nāanmɪn na vɛn ka yɪ bɔɔ a yelnyɪnɛ.

**XVI** Yɪ vɛ ka sɪ mɔɔ nɪbir nɪ a bonɪ anyāna sɪn ben tara.

**XVII** N yɛer, yɪ pɔɔ a yɪ taaba na yɪ turo a le ɪn dɔɔ maal wiil yɪ, na yɪ bɔɔn a bala na kpɪerɛ a le sɪn wiil yɪ.

**XVIII** Bojūu n dɔɔ de nie 'yer kɔ yɪ, tɪche pɔpāanyā nɪbikɔɔ pɔ le n 'yerɛ kɔɔ yɪ, bamɪne kpɪerɛ na fɪka a Kɪrɪsɪto daa ɪn 'laarfɔ kɔ ba.

**XIX** A ba baaraa ɪn sɔɔfɔ, a ba ŋmɪn le ɪ a ba āgān bɔbɔɔrsɪ. Ba wile na ba māɛ nɪ yelsɪ ala na ɪ vā nɪ ɪfɔ, a ba tɪersɪ ɪn a wer nyā ju bɔbɔɔrsɪ tɛɛ tɪer.

**XX** Tɪche sɪn 'lɔ ɪn saaju Nāanmɪn bibiir, be le sɪ chele a Fafaara na ɪ a sɪ Soro Yesu Kɪrɪsɪto ka wɔ na yɪ wa.

**XXI** A 'lɔ na tara kpɛɔ tɔɔ bon jaa na wɔ pire, won den a kpɛɔ 'lɔ lɛb a sɪ āgāma ka a kaara a wɔ māɛ tɪr āgān kaar.

## IV

**I** A le jūu, n yɛer yɪn ɪn nɔ, naa pāa bɔɔɔɔ ɪka n nyɛ yɪ, yɪn le ɪ a n pɔpɛl nɪ a nāa jupɪl, yɪ ara kpɛɔ a sɪ Soro pɔ n barmɪne.

**II** N 'maal a Yuodiya nɪ Sɪntachi ɪka ba tara a tɪer bɔ'yen nyāna a sɪ Soro 'yɔɔ.

**III** Ɔɔ, n mɪ le sɔɔɔɔ fɔ naa, n baraa ɪka fɔ sɔɔ a pɔbɔ banyāna, ba lɔɔn man di dɔɔyɛ a Nāanmɪn 'yer nɔɔ mɔɔlfɔ pɔ 'matāan Kɪlɛmentɪ, na ɪ a n tɔtɔtaaba, a bala yoe na be a nyevɔr gān pɔ.



IV Yɪ tara pɔpɛl a sɪ Soro 'yɔɔ sɔɔ jaa. N lɛ bɔɔ 'yɛrɛ kuro yɪ, yɪ tara pɔpɛl.

V Vɛ ka nɪrɛ jaa nyɛ lɛ yɪn siir a yɪ mɛɛ jã. A sɪ Soro waa ta naa.

VI Yɪ ta vɛ ka yeɛ jaa wɔnɔ yɪ ɛ, tɪchɛ a yɪ Nãanɲmɪn sɔɔrfɔ pɔ, yɪ ma puor wɔ yãan, na yɪ vɛ ka Nãanɲmɪn bɔɔ a bon 'lɔ yɪn bɔɔrɔ.

VII A Nãanɲmɪn nyã'maar na gar a nɪsaal bɔɔfɔ, na gun a yɪ nyãn, nɪ a yɪ tɪɛrɪ a Yesu Kɪrɪsɪto 'yɔɔ.

VIII N yɛɛr, a baaraa nɪ nyã ɪka bon 'lɔ jaa na ɪ yɛlmɛɛ, nɪ bon 'lɔ jaa na ɪ 'yɔɔfɔ, nɪ bon 'lɔ jaa na tor, nɪ bon 'lɔ jaa na ɪ cheche, bon 'lɔ jaa na ɪ nɔfɔ, nɪ bon 'lɔ jaa na ɪ pɔpɛl, ala ɪ bon 'lɔ jaa na ɪ vɪla, nɪ bon 'lɔ jaa na sɛɛn pɛɛfɔ, yɪ tɪɛrɛ a bonɪ anyãna.

IX Bon jaa yɪn jãn tɪ na yɪ nyɛ, tɪ na yɪ wɔ yɪ a n sɛ, yɪ maala yaa, ka a Nãanɲmɪn na ɪ nyã'maar sɔɔ, na ben a yɪ sɛ.

X N tara na pɔpɛl a sɪ Soro 'yɔɔ nɪ yɪn wiil ɪka yɪ chɛnɛ na tara a n tɪɛr. Yɛlmɛɛ yɪ dɔɔ tara a n tɪɛr tɪ na yaa tɔɔ nyɛ sɔr wiil ɛ.

XI N ba 'yɛrɛ wɪɛ ɪka n bɔɔrɔ na bon jaa ɛ, bojũu n dɔɔ jãn lɛ ɪn na tara bon ka wɔ sɛɛn ma.

XII N bɔɔn lɛ an sɛɛ ɪka nɪrɛ wɔ tara jaa pɔurbɪɛ, naa lɛ bɔɔ lɛ an sɛɛ ɪka nɪrɛ wɔ tara yɔɔ. A yɛlsɔɔlaa nyãna lɛ n jãn naa guolo nɪ a n mɛɛ, ka kɔ kɛɛ man bɪ, ka n tara na na di bɪ, ka bãlãa gba lɛ n tara na di, ka n tara na yɔɔ bɪ, n ba tara bon jaa ɛ.

XIII ɪn tɔɔ ɪ a anyãna a jaa tu a Yesu Kɪrɪsɪto na kɔ ma a kɛɛɔ pɔ.

XIV Tiche yi maal vɪla, yɪn sɔ̃s ma a sɔ̃s 'lo ɪn dire a dɔɔye.

XV Yɪn Filipai nɪbe bɔ̃ɔn naa ɪka a daar 'lɔnɔ̃ jaa yɪn sɔ̃s a Nāanmɪn 'yer, a sɔ̃s 'lo jaa ɪn yi a Masedonɪya, pupuorbiir gbulsɪ āsɔ̃s jaa ba kɔ ma bon ε, ka yɪn tɛε ba le ε.

XVI A sɔ̃s 'lo gba ɪn be a Tesalonika, yɪ sɔ̃s man nɪ a n bɔ̃bɔɔrsɪ gar gbeɓɔ'yen.

XVII A ba ɪ tɔ̃nɔ̃ le n bɔ̃ɔɔ ε, tiche n bɔ̃ɔɔ na ɪka yɪ nye ɪka a Nāanmɪn wɔ̃ yab yɪ na wɔ̃ sɔ̃s yɪ.

XVIII N nyen a n sāyar yɔ̃ɔ, naa gba nye tɪ pɔ̃n bar ka a seen ma, pɔ̃pāanyā n nūu kpe naa a kɔfɔ ala yɪn tɔ̃n a Epafaroditusɪ ka wɔ̃ wa kɔ ma, ka a yɪ kɔfɔ anyāna kaar fɪka a bɔ̃ɔɔlo bomo ala na nyuro nɔ̃ɔ naa pele a Nāanmɪn pɔ̃ɔ.

XIX A n Nāanmɪn na kɔ yɪn a yɪ bɔ̃bɔɔrsɪ a jaa tu a wɔ̃ tur nābonsɪ ala na be a Yesu Kɪrisito 'yɔ̃ɔ.

XX A sɪ Sāa Nāanmɪn wɔ̃ nyere tur bɪbir nɪ bɪbir jaa. A ɪ a le.

XXI Yɪ puor a Nāanmɪn nɪbe ba jaa na be a Yesu Kɪrisito 'yɔ̃ɔ. A n yeer na be a ka mɪ puoro yɪ naa.

XXII A Nāanmɪn nɪbe mɪ ba jaa puoro yɪ naa, ka a bala mɪ na be a nākpɛε Siisa yir mɪ puoro yɪ.

XXIII A sɪ Soro Yesu Kɪrisito wāɛfɔ a be a yɪ sɪr pɔ̃. A ɪ a le.

**A Nãanmun Nɛtur Oaalaa Gãn, Burfoor  
Birifor, Southern: A Nãanmun Nɛtur Oaalaa Gãn,  
Burfoor New Testament**

copyright © 2006 Wycliffe Bible Translators, Inc.

Language: Birifor, Southern

Contributor: Aramaic Bible Translation, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

97b1f1fe-19fd-52d9-9481-ad2a6ade2772